



ATASSUT

UPA2015/140

Siverth K. Heilmann

21.05.2015.

Kommunit akornanni aningaasaqarnikkut naligiissarinerup sunik tunngaveqarluni sunillu siunertaqarluni pisarnissaanik oqallinnissamut siunnersuut.

(Inuit Ataqatigiit Inatsisartunut ilaasortaataitaat)

Inuit Ataqatigiit Inatsisartuni ilaasortaataitaasa ataatsimoorlutik kissaatigaat Kommunit akornanni aningaasaqarnikkut naligiissarinerup sunik tunngaveqarluni sunillu siunertaqarluni pisarnissaanik Inatsisartuni partiit Naalakkersuisullu oqallissasut.

Kommunit oqallinnermi matumani ilaasinnaanginnerat innersuussutigalugu ATASSUT-mit oqallisissiap isummersorfiginissaa mianersorfigingaeraluarlutigu Inuit Ataqatigiit qutsavigaagut oqallisissiamik pingaaruteqarlunnartumik qaqitsimmata, kissaatigaarpullu oqallinneq manna Naalakkersuisunut aammalu Kommuninut sakkussanik pitsaasunik tunniusisaqarnermik kinguneqarluarumaartoq.

ATASSUT-mit isumaqarluinnarpugut Kommunit tamarmik peqataaffigisinnaasaannik attanneqarsinnaasumillu aaqqissuisoqassappat, taava paasissutissat naligiissarinermut atorfissaqartinneqartut pitsaanerpaatinneqarnissaat qulakkeerneqartariaqartoq, taamaammat ATASSUT-mit naammagisimaarparput paasissutissat aalajangersaanernut atorneqartussat nutaajunerpaatikkumallugit annertunerpaatikkumallugillu Naalakkersuisut Kommuninik suleqateqarlutik suliamik ingerlatsillualereersimmata.

ATASSUT-mit qangaaniilli kissaatigisaraarput suliassaqarfinni ingerlatsinerit pillugit nakkutilliinerit ilisimasaqarnerillu annerpaatinneqartariaqartut taamaammallu pisortat ingerlatsinerat pillugu nakkutiginninneq annerpaallunilu ataqatigiissaagaasariaqartoq. Paasissutissammi pitsaanerpaat atorlugit siunnerfinnik tikkuussisarneq ullumikkut inuusunut uagutsinnut iluaqutaaginnarani siunissami nunatsinnik ingerlatsilerumaartunut annertuumik oqilisaataassasoq qularutigisassaangimmat.



Kommunit akornanni aningaasaqarnikkut naligiissarineq aqqiiviginiarlugu kingullermik periarsimaneq Kommunit avissaartuutilernerannik ajoraluartumik kinguneqarsimasoq ATASSUT-mit arajutsisimangilarput, assullu kissaatigaarput periaaseq nutaaq aqqutigalugu Kommunit kingumut allorissaaqatigiileqqinnerannik inerisitaqarfiusinnaajumaartoq.

ATASSUT-mit ussersorsiorsinnaagaluarput apeqqummut tunngatillugu immikkuualuttunut pulataassalluta, ilaatigut Namminersorlutik Oqartussat allaffissuini sulisut aammalu aktiaatileqatigiilluni suliffeqarfissuit Nuummit aallaaveqarlutik ingerlatsinerisa kingunerisaanik Kommuneqarfik Sermersuup Kommunit sinnerinut naligiissarutaasa allanngortinneqarnissaannik Kommunit sinnerisa pingasut kissaataat matumani isummersorfigissallugu ussersorsiorsinarsinnaagaluarpoq, taamaattorli Kommunit ilusilersuiniarnermi aalajangiisuulluinnartussaammata toqqarparput Namminersorlutik Oqartussat aammalu Kommunit sinnissaasa akornanni tamanna oqaloqatigiissutigineqarlunilu isumaqatigiissutigineqarnissaa utaqqimaassallutigu.

Oqallisissiamut oqaaseqaatitsinnut atatillugu ATASSUT-mit Naalakkersuisut qutsavigissavagut sulinerup killiffia pillugu akissuteqaamminni erseqqissumik nassuiaateqarmata.

Taakkuupput oqallisissiamut aallarniutaasumik oqaaseqaatigiumasagut.